

四庫全書

史部

欽定四庫全書

殿閣詞林記卷二十一

明黃佐

廖道南撰

薦舉

聖祖之靖元亂也干戈未定即大召四方名儒隨所在館穀之使各以其所知薦戊戌十二月辟儒士范祖幹葉儀為諮議己亥正月克婺州初置中書省召儒士許元胡翰十餘人會食省中日令二人進講經史敷陳治

道及克處州又薦青田劉基龍泉章溢麗水葉琛金華
宋濂者即遣使以書幣徵之庚子三月至建康入見甚
喜賜坐從容與論經史及咨以時事深見尊寵既而命
有司即所居之西創禮賢館以處之始置儒臺校理以
官儒臣時李文忠守金華復薦王禕王天錫至皆用之
尋建尚賓館以待薦舉至者丙午年置博士廳設博士
一人典籤十餘人以備顧問博士則許瑗許存仁典籤
則劉秩鮑穎吳毅劉辰黃哲涂穎之屬侍從文學之職

寔權輿於此及置翰林院則擢諸儒之良有文行者任
焉洪武六年復大徵天下儒士浙江叅政徐本首以桂
彥良薦待詔闕下奏對稱旨擢春坊正字未幾浙江布
政使安然等以懷遠縣教諭王景等薦既至命日直翰
林隨班朝見賜燕西序七年學士宋濂侍上登武樓賜
坐問及宿學之士濂以會稽郭傳對上覽其文稱善名
見謹身殿稱旨擢應奉翰林文字十年復聘金華儒士
吳沉以侍臣有薦之者十月召見稱旨以為待制十五

年復徵耆儒隱逸侍臣張寧以宛平儒士董倫薦召至
以為太子贊善大夫賜冠帶是年置諫院官十月以耆
儒劉靖為諫院左司諫兼左春坊左庶子關賢為右司
諫兼右春坊右庶子趙肅為諫院左正言兼左春坊左
諭德何顯周為右正言兼右春坊右諭德十七年七月
下詔徵賢耆儒汪仲魯至自婺源儀禮司引見有旨舉
西伯戡黎篇命之講釋稱旨授左春坊左司直郎又數
日劉三吾至自茶陵入見便殿見其莊重宏博甚禮重

之即拜左春坊左贊善未幾擢本院學士十八年三月
開進士科始定進士入翰林之制自此薦舉者乃不輕
授云永樂中本院真少遂簡命侍臣更薦引之於是首
擢審理副楊士奇為編修繼擢儒士曾日章為侍講助
教鄒緝為侍讀改給事中金幼孜王洪桐城縣知縣胡
儼為檢討又以太平訓導蕭引高袁州訓導廖敬先為
檢討應天訓導王汝玉蕪湖訓導張伯頴為五經博士
皆異數也自後惟於進士及庶吉士內擢用宣德七年

大學士楊士奇薦交趾南靈州知州黎恬文學操行可
任近侍遂拜右春坊右諭德恬既至不副輿論江右人
寓詞林者或咻之乃求歸其鄉自是薦舉進者益罕矣
天順二年忠國公石亨大學士李賢交薦撫州處士吳
與弼名以為左春坊左諭德固辭不拜成化十八年廣
東布政使彭韶巡撫兩廣都御史朱英交薦新會舉人
陳獻章既至吏部欲試之辭以疾自陳患病乞歸侍養
詔授檢討侍親終病愈仍來供職獻章即與弼門人也

後屢被薦皆援詔不行二人者皆以理學鳴於時隱居求志天下高之竊謂科目未足以盡天下之賢才矧岩居川觀抱道不售與就試有司而屢黜者豈無其人乎薦舉之典誠不可廢也

銓注

洪武初年本院官皆由薦舉進雖設進士科未有入翰林者以第一甲賜進士及第丁顯練安黃子澄為修撰第二甲賜進士出身馬京齊麟等為編修吳文等為檢

討皆出簡用不由選法命下禮部惟銓注而已後遂為
例策進士以第一人任亨泰為修撰第二人唐震第三
人盧原質為編修著為令至今因之則許觀張顯宗吳
言信則張信景清戴德彛則陳郊尹昌隆劉諤是年六
月覆試則韓克忠王恕焦勝遵洪武乙丑之例第一甲
胡廣王艮李貫皆修撰第二甲吳溥楊子榮楊溥劉現
皆編修進士第一人魯滌擢修撰第二人周述第三人
周孟簡仍銓編修則復遵戊辰之令也林環陳全劉素

蕭時中苗衷黃暘馬鐸林誌王鈺陳循李貞陳景著李
騏劉江鄧珍魯鶴齡劉矩裴綸邢寬梁禔孫曰恭馬愉
杜寧謝璉林震龔錡林文魯鼎趙恢鍾復周旋陳文劉
定之施槃楊鼎倪謙劉儼呂原黃諫商輅周洪謨劉俊
彭時陳鑑岳正柯潛劉昇王俱孫賢徐溥徐鎔黎淳徐
瓊陳東中王一夔李永通鄭環彭教吳鈺羅璟羅倫程
敏政陸簡張昇丁溥董鉞吳寬劉震李仁傑謝遷劉戩
王鏊魯彥楊守陞曾追王華黃珣張天瑞李旻白鉞王

敕費宏劉春涂瑞錢福劉存業靳貴毛澄徐穆羅欽順
朱希周王瓚陳瀾倫文叙豐熙劉龍康海孫清李廷相
顧鼎臣董玘謝丕呂柟景暘戴大賓時大學士焦芳用
事第二甲第一人焦黃中芳子也有中旨以黃中及第
三甲第一人胡績宗俱為檢討及黃中之敗也績宗亦
坐貶楊慎余本鄒守益唐臯黃初蔡昂舒芬倫以訓崔
桐楊惟聰陸鉞費懋中蓋自永樂以來進士得銓注者
惟第一甲而二甲三甲必改庶吉士乃得銓注云

吉士

庶吉士之選始自洪武以諸進士未更事欲優待之俾觀政於諸司候諳練然後任之其在本院承敕監等近侍衙門者采書經庶常吉士之義俱改稱為庶吉士其在六部及諸司者則仍稱進士云是科本院庶吉士則陳淇等吏科則楊靖等戶科則郭資等禮科則徐旭等厥後楊靖為刑部尚書郭資為戶部尚書封忠勤伯惟解縉黃金華為中書庶吉士因之本院庶吉士取數十

人擇二十五人暨首甲三人俾進學內閣周忱自陳願
與其列遂增忱為二十九人命學士解縉領其事御前
親教之首擢王英王直為修撰又擢羅汝敬余鼎彭汝
器為修撰余學夔為檢討楊相劉子欽章敞陳敬宗沈
升李時勉段民倪維哲吾紳楊勉等俱刑部主事蓋舊
制欲作養積久因其成材次第擢用然急於進者或缺
望焉故相等皆除刑部庶吉士陳孟潔曾春齡輩卒於
京師或以教習已近十年為言時論其希進以張叔豫

等皆除府通判二甲庶吉士錢習禮陳璲黃壽生劉永清等教習未久皆擢檢討三甲中則方復等庶吉士王翺擢大理寺左寺正宋琰鄭雍言高穀張益俱中書舍人黃仲芳等授知縣惟曹義彭麟應授編修許彬連智授檢討庶吉士周叙董璘習嘉言楊珙尹鳳岐陳珣俱授編修餘皆授諸司官有差宣德中三科進士選入翰林為庶吉士者二十八人薩琦賴世隆吳節江淵徐瑄授編修王玉王振姜洪李紹授檢討程後更名有貞振

後更名詢是年猶有選入六科近侍諸衙門者庶吉士
十二人其出舊科者一蕭鎡也惟鎡授編修是科以後
始定庶吉士止入翰林然以為重事不輕予以四年七
年十年進士皆不選至是純選北方及蜀產者二甲萬
安劉吉劉珣李泰授編修三甲邢讓李本授檢討尹旻
等授給事中監察御史有差二甲吳匯周輿戚瀾劉宣
楊守陳王獻童緣授編修三甲江潮宗張業授檢討二
甲丘濬彭華尹直授編修二甲張元禎汪諧劉健授編

修三甲周經鄭紀張頤授檢討二甲李東陽倪岳焦芳
陳音謝鐸授編修三甲傅瀚張泰吳希賢授檢討二甲
林瀚章懋李傑黃仲昭商良臣授編修三甲莊杲授檢
討二甲費閻尹龍喬維翰王臣授編修二甲梁儲張灤
楊傑敖山劉忠于材徐鵬鄧掖江瀾馬廷用授編修三
甲劉機張芮楊廷和楊時暢武衛授檢討庶吉士之留
官翰林者至是盛矣二甲程楷蔣冕黃穆傅珪華巖吳
儼羅玘蘇葵授編修三甲李遜學石瑄毛紀授檢討二

甲顧清沈燾吳一鵬汪俊周玉黃瀾授編修三甲薛格
授檢討二甲濮韶陳霽葉德賈詠授編修三甲汪偉王
九思劉瑞授檢討二甲魯鐸溫仁和李時膝霄畢濟川
何瑋授編修三甲周禎盛端明授檢討二甲崔銑嚴嵩
湛若水陸深翟鑾徐縉授編修三甲段炅穆孔暉孫紹
先易舒誥張邦奇授檢討二甲第四人劉仁宇之子也
逆瑾傳中旨併其上二名邵銳黃芳及三甲李志學韓
守愚凡五人為庶吉士數月即拜銳芳仁為編修瑾敗

仁黜銳芳皆坐累左遷云二甲許成名劉棟張璧應良
尹襄劉朴費寀張潮王思孫承恩劉泉林文俊孫紹祖
授編修三甲金臯吳惠郭維藩王元正陳寰張衍慶邊
憲授檢討二甲汪佃余承勛黃易江暉劉世盛葉桂章
葉式馬汝驥王三錫陳沂廊灝授編修三甲張星蕭與
成林時季方湯惟學授檢討二科庶吉士留用之多前
此所未有也二甲廖道南江汝璧童承叙黃佐王相王
同祖王用賓張治授編修蓋自宣德以前兼授部屬中

書等官正統間始有授科道者成化後不授中書正德
辛未丁丑止授科道而無部屬辛巳仍復兼授焉國初
最重是選雖二甲第一人及會元或選而不預或預而
不留其嚴如此丘濬嘗謂每科不必多選所選不過二
十人每選不必多留所留不過三五輩其言誠是也然
必有通融之術而後可以免遺材之嘆高皇帝之久於
教習也蓋欲盡使之積學以待問蓄德以克用而後已
未嘗遽出入前輩謂翰林官惟首甲即除授選為庶吉

士者遠則八九年近則四五年而後除授有不堪者乃改授他職世以職清務簡稱翰林為玉堂仙亦切喻也今公署教習不過三年即評品而去留之使有晚成者出乎其間曷由進哉成祖加意躬親校閱該授科道部屬等官有志進學者許自陳願就近侍他職如高穀輩授中書舍人之例穀後以學行獨優陞司直郎遂入翰林為侍講宣著為令庶使華國之儒不至有遺而祖宗之制可復也

纂修

洪武六年十二月以儒士朱右趙堦朱濂孫作為編修以纂日歷故也作辭不拜明年五月日歷始成云纂修擢用蓋自此始洪武末年充修史官者有教諭等官王景高讓吳勤趙友士端孝思張秉彝唐畊葉惠仲胡仲昭等景即拜侍讀餘各除主事永樂初高廟實錄成詔定諸臣秩以太常寺博士錢仲益知縣楊靚梁潛王褒為修撰國子助教王達給事中朱紘為編修行人蔣驥

為檢討國子博士金玉鉉為五經博士晉府伴讀蘇伯厚為侍書教諭解榮劉宗平為待詔謄錄生真金寔為典籍亦有京職擢為外任上親裁定酌量才器銓授品職迨重修高廟實錄及修四書五經性理大全大典諸書主事李時勉陳敬宗等擢侍講等官有差其後纂修擢用者主事劉球陳叔剛改侍講御史邵宏譽改編修自後纂修專用本院官此例遂廢

孝行

洪武二十六年八月詔褒異浦江鄭氏累世同居家範
克篤里人王氏效之乃徵二家子弟年三十以上者詣
闕既至令自推舉乃以鄭濟為左春坊左庶子王懃為
右春坊右庶子徐州民權謹十歲喪父哀毀幾絕洪武
中以薦知樂安縣進光祿寺署丞迎母就養母疾籲天
求以身代母卒負土成墳廬墓三年哭泣不輟事聞聖
祖命為文華殿大學士辭不允以風天下之為人子者
尋改通政司右叅議致仕仍旌其門曰孝行云詩有之

有馮有翼有孝有德以引以翼聖人以孝治天下固如此若以文墨自矜罔修於家而欲其揚於王廷固已難矣

直諫

洪武十五年二月以福建儒士沈士榮為待詔士榮抗疏言天下事謂當修治省刑且請給筆劄條列事宜或入侍左右劇論庶事雅重其鯁直賜手詔褒重之十六年十月秀才周煥奎高孟文入見論時事劄切上大喜

皆擢為檢討二十六年十一月學官入覲者詢民間政
事得失在列者多應對不稱旨獨秦州訓導門克新敷
奏亮直擢右贊善紹興府學教授王俊華以善文辭擢
右贊善召二人謂之曰吾所以左克新而右俊華者重
直言故也皆悚然悅服他日侍臣李思迪馬懿顧問默
默則黜之使忠謹之言日聞聖祖之詒謀遠矣

者俊

太祖嘗曰古之老者雖不任以政至於咨詢謀謨則老

者閱歷多聞見廣達於人情有可資者故洪武中多擢老成之士官以本院及為東宮輔導耆儒劉靖關賢為庶子趙肅何顯周為諭德學士劉三吾文淵閣大學士朱善左司直郎汪仲魯皆年踰六十時承顧問翊贊儲極趨朝則同列賜坐則聯席衣冠儼雅修潔人望而敬之時稱翰林三老洪武十九年七月詔舉經明行修練達時務之士年七十以下即縣禮送京師上曰比來有司不體朕意豈知老成古人所長文王用呂尚而興穆

公不聽蹇叔而敗伏生雖老猶傳經豈可槩以老而棄之也若年六十以上七十以下者當置翰林以備顧問聖祖貽謀任用老臣臻於至治有非前代可及者

隱逸

處士吳與弼之見薦也天順元年十月上遣行人曹隆勅曰渴望來儀以資啟沃二年五月壬寅至京師時特召大學士李賢問曰與弼授以諭德何如賢對曰可然諭德有左右上曰與之左授左諭德與弼固辭上御文

華殿召對賜紗羅羊酒柴米有旨朝廷久聞高誼特用
徵聘今惠然遠來喜悅然幣以將誠官以命德禮非過
也不允所辭或勸就職與弼曰淺陋之學衰病之軀豈
堪任使敢竊祿哉再疏辭上褒答之有曰亦不煩卿以
冗務特處以官僚之職不必再辭戊申大學士李賢請旨
召入內閣講中庸己酉三疏辭且請閣中秘書有旨固
辭雖得難進之義揆之中道無乃過乎欲觀秘書可勉
就職丙辰令其子璫赴吏部告疾七月庚寅四疏終辭

奉旨既年老有疾不能供職准辭丙申進封事十策一
曰崇聖志二曰廣聖學三曰隆聖德四曰子庶民五曰
謹教令六曰敦教化七曰清百僚八曰齊庶政九曰廣
言路十曰君相一德同心己未召入文華殿上眷賚無
已賜以銀幣給以月廩復遣行人王惟善送歸仍賜詔
褒嘉示以拳拳至意與弼既辭上勅惟善曰天氣近寒
吳與弼年老一路好生看顧莫教他費力古帝王褒賢
之盛節大臣推賢之盛舉於是乎至矣

聖裔

洪武六年四月孔子五十五世孫孔克表以學行舉上
與語經史獻納言皆稱旨拜修撰兼國史編修官永樂
以後累舉象賢世祿之典顏子孟子周子程子朱子後
裔擇宗子以聞皆授世襲五經博士惟居鄉給俸以奉
祭祀而已景泰時誠意伯劉基後裔亦援此例得世襲
五經博士弘治中孔子嫡派在浙江衢州者有司以宗
子孔彥繩奏聞詔授世襲五經博士尋改劉基之後為

指揮於是崇道酬勲之意昭昭矣今上登極崇重世德復功臣劉基之孫瑜為誠意伯蓋千古盛典也

任子

洪武九年六月上謂學士承旨宋濂曰朕自布衣鄉起草萊列侍從世與國同休不亦美乎趣官其子孫屢辭謝不敢奉詔不允遂徵冢子瓚之子慎為殿廷儀禮司序班未幾復召价子璉除中書舍人上時命題試璉與慎而戒之語濂曰朕為卿教子孫濂或奏事久稱倦遂

特命遜慎共扶下殿父子祖孫三世皆官內廷當世以
為榮厥後復錄濂之孫懌為本院侍書云永樂中學士
胡廣卒詔以其子種為檢討累遷至修撰洪熙時尚書
兼詹事金忠之子達擢檢討賜歸依親讀書正統末改
給事中尚書王直之子穉為檢討大學士楊士奇楊榮
則皆蔭尚寶丞及中書舍人自是遂為定制無任翰林
者孝廟眷注大學士丘濬輩官其後多至三四人然或
有援以陳乞者矣獨宣德中大學士金幼孜疾革士奇

榮問之惟言受國家恩重生無益於當時死無益於後世復何言或啟請身後之澤者則正色曰為子弟求祿君子所耻此其最可稱者也

改擢

本院官特清貴舊不輕改擢學士官雖五品序秩於尚書之上洪武三年七月丙申以太常寺卿魏觀為侍讀學士六年四月丙辰以兵部尚書樂韶鳳為侍講學士吏部尚書詹同為學士承旨仍兼吏部尚書八年三月

以廣西按察司僉事達魯與權為修撰十三年五月癸丑以山西右布政使趙新為修撰十五年十一月戊午以禮部尚書邵質為華蓋殿大學士十六年十月以僉都御史茹太素為檢討瓊州府知府趙瑁為左諭德三十四年九月以左僉都御史凌漢為左贊善蓋本院自革承旨後為五品衙門居庶寮以學行著聞而改擢者品秩大都由尊改卑蓋崇儒右文之體當如是也永樂初進高廟實錄猶先學士王景而後及禮部尚書李至

剛其尊重可知魯榮以狀元及第官居侍從將二十年始得侍講學士上顧左右謂曰魯榮也與學士矣意猶謂其早也是時燕邸左長史金忠不得廁名翰林惟拜工部宣宗雖擢山東張瑛入翰林以嘗為詹事府舊僚宋故也景帝興自邸邸其左長史儀銘亦官止禮部左侍郎未有遽擢為學士者其後一日拜六學士時人以為名器之濫兵部尚書陳汝言謂人曰昔十八學士登瀛洲今六學士同登何謂多耶此景泰之治鮮克終也

竊謂慎重名器當自本院始葉盛所著水東日記蓋備紀之

兼職

本院官始惟與詹事府左右春坊司經局互兼職事洪武中未設編修時多以修撰兼國史編修官其後以修撰任亨泰為詹事府少詹事兼修撰則東宮官兼本院官之始文華殿大學士全思誠兼左春坊左中允則學士兼宮僚之始也凡宮僚必俟儲位既正而後設然必

互兼無有專任者仁宗在東宮始以尚書蹇義金忠兼
詹事尚書李至剛兼左春坊大學士學士解縉兼右春
坊大學士侍講學士楊士奇等兼中允皆本聖祖初制
洪熙以後始有三孤及三師三少六卿侍郎通政事使
太常寺卿少卿尚寶司卿兼本院官者正統以後始有
都御史大理寺卿通政司叅議兼本院與殿閣官者若
詹事府詹事或不設而以尚書兼學士掌之左右諭德
及司經洗馬或兼講讀或兼修撰編修或兼校書等官

惟視時以為崇卑成化以後內閣止用吏戶禮三部兼職若左諭德則兼侍讀右諭德則兼侍講等官一定而不易則自弘治時始正德中詹事府左右春坊司經局等官通無一員百餘年來所未有也坊局諸印皆寄之本院本院學士又缺有一人帶管二印者蓋逆瑾與奸芳主之大學士李東陽曰旁觀坐視不能捄正咎有所歸正指此也

殿閣詞林記卷二十一

欽定四庫全書

殿閣詞林記卷二十二

明黃佐

廖道南撰

議禮上

祖宗時凡國家禮樂制度皆命本院儒臣議而行之洪武元年二月壬寅朔中書省臣及學士陶安等進郊社宗廟議曰園丘曰方丘曰宗廟曰社稷各具沿革安等奏天子大社必受風雨霜露以達天地之氣若亡國之

社則屋之不受天陽也今於壇創屋非宜若祭而遇風
雨則於齋宮望祭上是之又定宗廟祭享之禮安與侍
講學士朱升待制詹同等歷考秦漢以下廟皆同堂異
室四時皆合祭今四廟時享宜倣之上命春特祭於三
時合祭如古制至二年三月戊戌朱升等奉勅撰齋戒
文大祀四日戒三日齋凡七日中祀三日戒二日齋凡
五日上命凡祭天地社稷宗廟山川等神是為生靈祈
福下令百官一體齋戒若自有所禱者不下令八月定

大祀受誓戒九月乙巳詔以司中司命司民司祿及壽
星五神為中祀命翰林院撰文七年六月乙卯上大
祀終獻畢方行分獻於禮未當命宋濂詹同議以若行
初獻禮奠玉帛將畢分獻官行初獻禮亞獻終獻皆如
之八月辛酉監察御史達魯與權請行禘祭事下禮部
太常寺翰林院議以為虞夏商周四代世系明白其始
所從出可得而推故禘禮可行自漢以來世系無考莫
能考其始祖所自出當時所謂禘祭不過合已祧之主

序昭穆而祭之乃古之大禘非禘也宋神宗嘗曰禘者所以審諦祖之所自出是則莫知祖之所自出禘禮不可行也八年十一月乙丑詔翰林院考定大祀登壇脫鳥之禮學士樂韶鳳奏祭日大駕臨壇入幕次脫鳥升壇執事等官皆脫鳥於外以次升壇供事協律郎樂舞生依前跣鞮就位祭畢降壇納鳥從之正月合祀天地於南郊詔儒臣紀其事九年五月乙丑將有事於方丘適有晉王妃之喪上命宋濂考古制以聞對曰郊社之

禮國之大事聖人所重雖有三年之喪亦不敢廢示有尊也二十五年六月懿文皇太子喪時享在邇命翰林院禮部議之學士劉三吾等奏王制三年不祭惟天地社稷不敢以卑廢尊宋真宗居喪易月服除之明年遂享太廟祀天地服袞冕車輅儀物音樂緣神事者不廢其鹵簿鼓吹諸樂皆備而不作茲議天地社稷先師歷代帝王等神宜如宋制惟太廟先祖靈神所在國既有喪而時享用樂恐神不樂聽宜備而不作從之已而上

自以己意定郊廟禮庶吉士解縉嘗上疏言六經殘缺莫甚禮樂宜正禮經祀天宜復掃地之規尊祖宜脩七廟之制上嘉其識先是洪武二年八月詔天下郡邑舉素志高潔博通今古練達時宜之士年四十以上者禮送至京纂修禮書二十年十月諭禮部集諸儒臣稽考臣僚尊卑禮儀舊制重加刪訂凡二十六條行之改元之初即定釋奠先師仲春仲秋二上丁日降香遣官祭于國學又詔定親征遣將諸軍禮及太歲風雲雷雨岳

鎮山川城隍諸神祭禮其冠禮皇太子冠翰林院撰祝文祝辭因定天子冠禮尋定皇太子親王及士庶婚禮俱本院偕中書省臣議上其王國禮樂及合祀山川之儀則本院禮部與王府官議上遂命燕齊祭東海齊魯祭東岳東鎮秦蜀祭西海晉祭北海禮孝慈皇后喪專詔本院定議以聞成穆貴妃薨詔本院稽古定制令父母俱斬衰三年子為庶母服朞月書成頒行曰孝慈錄又考議陵寢朔望節序之祭及祭前代忠臣用便服行

服等節今見於大明集禮洪武禮制等書雖損益古今之宜然皆出自聖意衆莫能違也雖敢言如解縉上亦未嘗以其異已而罪之夫以異已者為罪則必以合者為功以合者為功則是禮樂自臣下出也嘉靖九年正月十四日今上大詔廷臣問園丘方澤禮臣道南奏曰邇者伏蒙皇上頒賜勅諭詢以天地宗廟社稷之重及日月太歲諸神從祀之宜臣愚曷足以知此中庸曰非天子不議禮不制度不考文又曰君子之道本諸身徵

諸庶民考諸三王而不繆建諸天地而不悖質諸鬼神而無疑百世以俟聖人而不惑是故知禮樂之情者能作識禮樂之文者能述大人舉禮樂天地將為昭焉臣愚以為三代而上大道為公禮載諸經而典則明備三代而下大道既隱禮載諸史而議論紛紜自非天子建中和之極聖人通幽明之故安能折羣言之淆亂以嘉典禮之會通也哉謹按周禮大宗伯掌建邦之天神人鬼地祇之禮小宗伯兆五帝於四郊四望四類亦如之

兆山川丘陵墳衍各因其方蓋以辨方經野叙神奠位
法天地高卑之象順陰陽剛柔之義也其禮器則有曰
蒼璧禮天黃琮禮地有曰四圭有邸以祀天旅上帝兩
圭有邸以祀地旅四望其樂舞則有曰奏黃鍾歌大呂
舞雲門以祀天神奏太簇歌應鍾舞咸池以祭地祇有
曰圜鍾為宮黃鍾為角太簇為徵姑洗為羽雷鼓雷鼓
孤竹之管雲和之琴瑟冬至於地上之圜丘奏之函
鍾為宮太簇為角姑洗為徵南呂為羽靈鼓靈鼓孫竹

之管空桑之琴瑟夏日至於澤中之方丘奏之此周人
祀天地之遺典也祭法曰燔柴於泰壇祭天也瘞埋於
泰折祭地也禮器曰為高必因丘陵為下必因川澤因
天事天因地事地王制曰天子祭天地諸侯祭社稷又
曰惟祭天地社稷為越紼而行事又曰祭天地之牛角
繭栗則其義亦明矣然亦有專言祀天者曰禋祀昊天
上帝曰王祀昊天上帝則大裘而冕曰郊之祭也迎長
日之至也兆於南郊就陽位也曰祭之日王被袞以象

天蓋天者羣物之祖舉其尊而言也而天固無不覆也
有兼言祀社者曰祭帝於郊所以定天位也祀社於國
所以列地利也曰郊以明天道也社以神地道也曰禮
行於郊而百神受職焉禮行於社而百貨可極焉蓋古
封國立社舉其重而言也而地固無不載也夫天地之
道貞觀者也日月之道貞明者也法象莫大乎天地懸
象著明莫大乎日月變通莫大乎四時是故君后所以
承天地配日月而順四時者也若以為祀不可分郊不

宜貳祭統何以故天子躬耕於南郊王后親蠶於北郊也月令又何以故孟春迎氣於東郊孟夏則於南郊孟秋迎氣於西郊孟冬則於北郊也祭義又何以故祭日於東於壇於王宮祭月於西於坎於夜明也孔子繫易曰天尊地卑乾坤定矣卑高以陳貴賤位矣豈日月兆於東西迎氣耕蠶分於南北天地之位獨混而無別乎若易言享帝而不言享祗則帝大而尊而各有取象詩歌昊天而不歌后土則地卑而謙而不敢專功知此則虞

之類於上帝商之告於天神后周之郊用牛二春秋
魯人之僭祈穀之郊先儒固自有明辨矣臣故曰三代
而上大道為公而典則明備也漢郊祀志載秦祠四時
八神漢高因之增為五時武帝祀太乙於甘泉后土於
汾陰成帝從匡衡之議立南北郊厥後王莽創為天地
合精夫婦同牢之說而始合祭矣光武中興雖兆南北
郊然合祭亦未之有改焉者也唐六典正月祀天祈穀
於圜丘夏至祭皇地祇於方丘俱以高祖配孟夏大雩

於圜丘孟冬祭神州地祇於方丘以太宗配至武后親
享南郊而復合祭矣玄宗中興雖從張說之議以祀后
土而亦未為得也宋史志南郊初有四祀太宗始創壇
北郊以祀地神宗因陳襄之議復南北郊及南渡以後
而禮文寢廢矣夫漢之議從匡衡者五十人從許嘉者
八人宋之議從陳襄者四十人從蘇軾者五人不有大
儒君子孰從而正之程頤曰元祐議行北郊只為五月
天子不可服大裘殊不知郊天郊地禮制自不同報本之

祭惟各從其類朱熹曰周禮有圜丘方澤之說後人却說社是后土看來自方澤之祭此皆不滿於宋議者也夫天道也父道也君道也地道也母道也臣道也天道至尊而無對者也地道無成而代有終者也漢之廢禮也自王莽始也莽以臣賊君無臣道者也唐之廢禮也自武曌始也曌以陰干陽無母道者也宋人之爭禮也則又介乎漢唐之間者也臣故曰三代而下大道既隱而議論紛紜也恭惟我太祖高皇帝開國之初大

召名儒博綜古典首制禮樂二局沿考制度數年於吳
元年建圜丘於鍾山之陽以祀昊天上帝建方丘於鍾
山之陰以祀后土皇祇至洪武元年二月壬寅朔聖祖
勅禮部翰林院太常寺諸儒臣曰自昔聖帝明王之有
天下莫嚴於祭祀故當有事內必致其誠敬外必備其
儀文所以交神明也朕誕膺天命統一海宇首崇祀事
顧草創之初典禮未備其何以交神明致靈貺今有國
大祀曰圜丘曰方丘曰宗廟曰社稷其各具沿革以進

於是丞相李善長傅瓛等禮部尚書陶凱等學士陶安等上議以為宜復古制祀天圜丘以大明夜明星辰太歲諸神從祀祀地方丘以五嶽五鎮四海四瀆諸神從祀而宗廟社稷亦各有議今載諸聖祖洪武實錄者足徵也其圜丘方丘樂章俱聖祖自撰今載諸御製文集者足徵也其圖制之詳禮儀之備今載諸聖祖存心錄及大明集禮祭祀禮儀者足徵也當時諸臣如宋濂則有天降膏露頌及觀心亭記所以紀事天之明也劉基

則有方丘頌所以紀事地之察也至洪武十年聖祖感齋居陰雨之應覽京房災異之說即舊址為壇合祀於一覆以大祀殿十二年始合祭焉上復更撰祀文樂章今載於御製文集夫前之分祭者酌萬世帝王之道禮本太始者也是先王之制也聖祖因之而未嘗自制焉者也後之合祭者感一時災異之應禮緣人情者也是後世之制也聖祖亦因之而未嘗自制焉者也厥後儒臣解縉奏云配天宜復掃地之規尊祖宜備七廟之制

而聖祖弗加之罪者意亦可識矣太祖遷都於北當時
儒臣未有建白以復聖祖初制之舊宜今日履我皇上
之詔諭也禮樂百年而後興詎不信哉宗廟之制國初
五祀親廟德祖玄皇帝廟居中懿祖居東第一廟熙祖
居西第一廟仁祖居東第二廟昭穆有定位禘祫有定
時視商家七廟周家九廟之制其揆一也至九年十月
乙卯改建太廟同漢人同堂異室之制時享歲祫則設
累朝帝后之衣冠於神座而祀之於是乎始以功臣配

享矣洪熙間復增以姚廣孝等配享夫古者人臣配立
惟伊尹見於盤庚之篇周禮凡有功者書於太常嘗於
太烝不過歲一從享而已漢祭功臣不於廟而於庭黃
魏始以荀攸配享而唐宋遂相沿襲矣夫德必若伊尹
親必若周公而後可矧其他乎今九廟已用同堂異室
之制累朝帝后臨之在上一氣流通而功臣配享殊無
降殺恐非古先聖王尊尊親親之道也至於社稷之制
皇上改之是矣昔之議者漫不之考以勾龍共工氏子

也鄭玄注疏以為共工乃太皞後神農前以水土名官者其子勾龍能平水土非四兇中共工也聖諭又云日月贊上帝以成化工止歲致一祭不得專誠以享臣堽禮郊特牲郊之祭大報天而主日配以月玉藻朝日於東門之外周禮大宗伯兆日於東郊兆月於西郊祭注王宮祭日夜明祭月祭義祭日於壇祭月於坎以別幽明以制上下祭日於東祭月於西以別外內以端其位觀禮拜日於東門之外反祀方明禮日於南門之外禮

月於北門之外天子大采朝日祖識地德故於春分祀
之少采夕月糾虔天刑故於秋分祀之國初諸儒已有
定議我聖祖亦有朝日夕月之文臣復何辭禮又曰有
其舉之莫敢廢也今之大祀殿穹窿闕仞高廣洞達崇
壇羅列密樹陰森祖宗所創立上帝所棲止者已百數
十年於茲矣古人思其人尚愛其樹而不忍伐豈敢云
毀以傷在天之靈按古者明堂之制正在南離之地大
戴禮曰明堂近郊韓詩傳曰明堂在南方七里之郊淳

于登曰明堂在國之陽三里之外七里之內其為說多
同孟子亦曰夫明堂者王者之堂王欲行王政則勿毀
之夫周人郊祀后稷以配天宗祀文王於明堂以配上
帝郊而曰天所以尊之也明堂而曰帝所以親之也天
也帝也其禮一也今之大祀殿正以倣古者明堂之制
也曰昊天上帝正所以親之也而未備夫尊之之典也
皇上法古帝王必欲行之臣豈敢妄言以干成典抑豈
敢不言以孤明詔宜法聖祖南畿初制於今之南天門

外別兆園丘以祀天尊聖祖以配之以法周人尊后稷
之禮兆方丘於北郊以祀皇地祇以法周人祀地之禮
而又宗祀太祖成祖於大祀殿以法周人宗祀明堂之
禮兆大明於東郊兆夜明於西郊以法周人朝日夕月
之禮增太廟大禘之祭正太祖南向之位移功臣配享
於兩廡庶尊尊有等而天地之大義不踰親親有統而
累朝帝后之大禮無間然矣夫舉大事者必動大衆動
大衆者必費出不貲今水旱蟲蝗海內告沴邊疆盜賊

邊圉竊發民力竭矣民財罄矣皇上慎重典禮軫惜民
隱或發內帑之財不至於斂民財或藉工匠營繕之力
不至於勞民力可也夫安循守者憚改更信耳目者疑
心志議禮之家名為聚訟此書生常態爾如昔者羣臣
之議禮也其心固無他也特其見有不同故也臣恐今
之羣臣之議禮也猶夫昔也其心亦無他也特其見有
不同故也皇上昭宣祖制之重叅酌衆議之公於議之
同者不必以為功於議之不同者不必以為罪則人心

和於下天心和於上祖宗列聖監於前子孫千億綿於後
億萬載無疆之休端在是矣

議禮下

永樂十一年十二月鴻臚寺奏習正旦賀儀詔禮部及
本院官問曰正旦日食百官賀禮可行乎尚書呂震時
曰日食與朝賀先後不相妨侍郎儀智曰同日免賀為
當成祖顧問曰日食行賀禮否楊士奇對曰日食天變
之大者前代元正日食多不受朝宋仁宗時元正日食

富弼請罷宴徹樂宰相呂夷簡不從弼曰萬一契丹行之為中國羞後有言敵是日罷宴仁宗深悔今免賀誠當上遂免賀及宴仍賜百官節鈔十四年十一月周王棼楚王楨相繼來朝例次日謁陵周王先至上命東宮皇太孫及諸皇孫陪謁已出東華門上遽召楊榮金幼孜楊士奇問謁陵展敬之位如何士奇對曰周楚二王屬尊當列稍前兩傍東宮殿下列稍後居中皇太孫殿下亦居中列於東宮之後諸皇孫與皇太孫同班分列

兩傍上曰爾所言有據乎對曰宋儒朱熹家禮大約如此上曰吾未嘗孰家禮但據已見書其位次遂出宸翰所書正與所言合然下有六字未書授筆命士奇足之遂遣鴻臚丞周昇馳齋赴陵俾率行之二十二年九月禮部尚書呂震言於仁宗曰今喪服已踰二十七日請如太祖倣漢制釋縗易吉服奏已士奇謂震曰今喪服未可比此例蓋洪武有遺詔且仁孝皇后喪成祖皇帝在上縗服後仍服數月白衣冠時黃淮議同士奇然不

敢明言忤震震出忽語尚書蹇義從旁解之曰渠言當
理國家事公豈應偏執已見請兼取二說明旦皆素衣
冠黑角帶遂偕六部都察院具奏報可明旦上素冠麻
衣經出視朝文臣惟學士武臣惟英國公如上服餘皆
從震等所定朝退上召蹇義夏原吉及士奇諭曰呂震
昨奏易服云皆與汝等議定然後奏時吾已疑其非但
聽臣下易之梓宮在殯吾豈忍易後聞士奇有言始知
震妄士奇所執是因嘆曰張輔知禮六卿乃有不及又

顧義曰汝所折衷亦未當然不必再以語人羣臣聽其便十二月庚午百官習新正儀於海印寺用樂明日士奇等進言近禮部與臣等已議定新正朝儀不用樂昨日習儀仍用樂不改今四方朝覲官皆集於此觀禮乞勅禮部設樂不作不報蓋入呂震之言也楊榮金幼孜皆欲已榮即趨出士奇與淮不可三人遂復進言夜漏下十刻未得旨不敢退遂有旨命禮部設樂不作正月二日特召士奇等四人至奉天門諭之曰呂震每事悞朕卿等

所執停樂最是夫為君以受直言為賢不受直言則過
益深為臣以能直言為賢不能直言則忠不盡如昨日
朝會若從震言今悔何及自今遇朕行有未當但盡意
言之毋以不從為慮各賜鈔千緡文幣一表裏天順中
聖烈慈壽皇太后崩英廟見學士李賢所服斬衰與眾
異取視之乃知賢服制合古即以為法命宮中悉易之
孟冬享太廟適大喪禮未終上以問賢言宜俟釋服後
庶人情事理兩安從之癸未春上以足疾不視朝召賢

曰大禮將至而疾未愈欲遣官代行可乎賢曰亦須至壇所雖不能行禮人心亦安上至齋宮復召賢曰朕惟俯伏弗興欲令一人扶之何如賢曰陛下能力疾行禮尤見敬天之誠遂畢事而還上以母后胡氏因疾請問尊號靜慈仙師非令典欲上皇后尊諡而左右以為不便召問賢賢曰陛下此一念天地鬼神實臨之然臣之愚必須陵寢享殿神主皆如奉天殿之式庶幾稱陛下之明孝不然為虛文上即命從之恭讓章皇后乃英

廟嫡母也憲宗即位內臣夏時倡言錢后久病欲致尊
隆於所生母賢與彭時援遺詔執不可夏入傳仁壽宮
旨曰予為皇帝母當為太后豈有無予稱太后者時曰
今日與宣德年間事不同胡后曾上表讓位退居別宮
故正統初不加尊號今日名分故在豈可不尊夏謂宜
照例寫讓表賢與時曰臣子誰敢擅寫天子新即位四
海顛望凡事宜遵遺詔庶幾順天理服人心夏作色以
為偏向時拱手向天曰祖宗神靈在上錢后已無後何

所利而為之所以爭者為全皇上聖德也故若推大孝之心則兩宮同尊為宜賢等皆曰然夏乃再入請命曰適皇上再三勸諭已俞允矣時等遂執筆書尊皇后為慈懿皇太后母妃為皇太后夏以為疑時曰加二字好稱呼耳非有尊卑於其間也於是尊號之詔遂下後數日大監覃包至內閣言曰并尊二母本出上意但屈於生母有難言者非二先生力爭幾誤大事矣時同僚有慙色蓋此禮之行賢與時之力也及議山陵賢等具疏

請建玄宮為三穴夏復執不從成化四年六月慈懿皇太后喪傳旨議山陵時等曰梓宮當合葬裕陵神主當祔廟此一定禮無可議者禮部尚書姚夔贊之曰此正禮也夏獨曰不可慈懿無子且有疾豈可入山陵只可比胡后例葬西山耳已而上御文華殿召內閣三人及諸內臣入面議上曰朕豈不知正禮是好但於有碍故令爾等議商輅曰外議洵洵若不祔葬則人心不服且於聖德有損劉定之曰孝子從事不從令雖聖母有言

亦不可從也。上默然良久曰：合葬固是孝，若因此失聖母心，不可謂孝。時曰：皇上大孝，當以先帝之心為心。先帝時慈懿始終如一，今若安厝於左，虛其右以待後來，則兩全其美，庶不失先帝之意。夏曰：比先閣下議作三位，已不允。時曰：彼時慮有今日，故預為此議。今須依前處置，乃宜耳。上雖未允，而玉色甚和。時因曰：臣等言未當，欲具本言之。乞皇上再三申勸聖母，以終大事。上曰：擬進來看。當晚時等具本進，有旨令百官會議明白禮。

部集文武大臣議皆云時等言是內批未允欲別擇地於是伏闕諫乃行焉語在伏闕弘治初元詔議憲宗升祔及孝穆皇太后祔享之禮議者人人殊禮部左侍郎倪岳言德祖以上無可復推則德祖視周后稷太祖太宗視周文武百世不祧懿祖而下以次迭遷今憲考升祔則懿祖神主當祧宜於太廟寢殿之後畧倣夾室之制別建一殿殿九室以藏祧主每歲墓時享則奉祧主仍居舊位以應古禘祭之制又周禮春官大司樂歌中

呂舞大濩以享先妣謂姜嫄也帝嚳之妃后稷之母故特立廟以祀而宋元德懿德二太后俱有別廟章獻章懿俱建奉慈殿孝穆神主宜於奉先殿旁別為一廟歲時祭享悉如奉先殿之儀從之於是遂建祧廟及奉慈殿時惟學士楊守陳獨以德祖比宋僖祖百世不遷為非禮抗言禮天子七廟祖有功宗有德乃孔子之言凡號太祖者即始祖必事之以配天若商周之契稷是已議者徒謂大臣嘗有取於王安石之說而不從孔子遂

使七廟有始祖又有太祖太祖既以配天而不正南面之位名與實乖豈先王之禮哉若為降而合食為非禮則王者既立始祖之廟又推始祖所自出之帝而配之固無嫌也憲宗升祔請并祔德懿熙三祖自仁祖以下為七廟異時祧盡則以太祖擬契稷而祧主藏於後寢祫禮行於前廟時享則尊太祖祫祭則尊德祖各不失尊庶無悖禮議者不從十七年三月聖慈仁壽太皇太后崩上御西角門朝退召大學士劉健李東陽謝遷至

門內扉遂闔上御煖閣素幄起立牀前顧謂曰先生輩
上來健等皆至幄內上曰為陵廟事與先生輩商量健
等仰奏曰昨蒙遣太監扶安諭示孝莊睿皇后塋不合
禮欲為釐正此盛德事臣等仰見皇上聖孝高出前古
不勝忻慕上袖出裕陵圖一紙指示陵門內有二隧道
其一西行北轉而至者為英宗皇堂虛其右壙而中有
道可通往來其一東行北轉而至者為孝莊玄堂相去
可數丈中隔不通因曰此大非禮東陽對以初不知昨

見成化間彭時姚夔奏先朝大臣都忠厚為國如此健與遷對曰英宗有遺命錢后與我合葬大學士李賢記在閣下上曰既有遺命當時奈何為之東陽對曰臣等聞當時尚有別議故委曲如此非先帝意也上曰先帝亦甚不得已耳健等奏曰誠如聖諭但今斷自聖衷勿憚改作則天下臣民無不痛快上曰欽天監言恐動風水朕不以為然陰陽宜忌之說不足信上曰朕以折之矣今日開壙合葬不為動風水乎皇堂不通則天地否

塞因以指畫紙曰若如此通則風氣流行惟一點誠心
為之料亦無害東陽贊曰皇上一念孝誠可以格天吉
無不利健等皆力贊曰皇上所見高出尋常萬萬願勿
復疑上曰此事不難若祔廟之禮尤所當講健等奏曰
先年奏議已定慈懿太后居左今大行太皇太后居右
祔祔裕陵配享英廟且引唐宋故事為證臣等不敢輕
議其實漢以前惟一帝一后唐始有二后宋亦有三后
並祔者上曰二后已非若三后尤為非禮遷對曰彼三

后一乃繼立一則所生母也上曰事須師古末世鄙褻
之事不足學東陽對曰皇上當以堯舜為法上曰然宗
廟事關係綱常極重豈可有毫髮僭差太皇太后鞠育
朕躬恩德深厚朕何敢忘但一人之私情耳錢太后乃
皇祖冊立正后我祖以來惟一帝一后今若並祔乃從
朕壞起恐後來雜亂無紀極耳且奉先之祭先生輩尚
不知英宗皇祖止設一座每祭飯一分匙一張而已健
等倉卒不解但應曰唯唯退思之蓋孝莊尚未配食也

上又曰孝穆太后朕生身母止尊稱為皇太后別祀以奉慈殿今仁壽宮前殿儘寬意欲奉太皇太后於此他日奉孝穆太后於後殿歲時祭享一如太廟不敢少缺健等皆未敢應聖意蓋謂今皇太后千秋萬歲後也東陽曰皇上言及孝穆太后尤見大公至正之心可以服天下矣上曰此事却難處行之則理有未安不行則違先帝之意又違羣臣會議會議猶可奈先帝何朕嘗思之夜不能寐先帝固重而祖宗之制為尤重耳東陽曰

願聖見主張得定臣等無不奉行上曰朕亦難於降旨
先生輩是朕腹心大臣好為處置是日上稱心腹者三
呼先生者以十數健等感激稱謝皆叩頭起次日朝退
上起立呼內閣健等至煖閣幄前立問曰先生輩昨日
所進令多官會議是幾箇衙門健等曰即前日進謚議
者東陽厯對曰五府六部都察院通政司大理寺及詹
事府翰林院言未畢上遽曰有翰林院最好考擬古今
大典禮須用翰林院又曰有科道乎皆對曰有上又曰好

少頃曰別無說話回去辦事蓋是日專為翰林問也自是每名必於朝退立呼內閣未嘗叱名二十一日復召上袖出會議本問曰此事如何東陽奏曰未知聖意如何上曰先生輩如何說健等對曰正是古禮上曰仍稱太皇太后可否皆對曰既是別廟湏如此尊稱為當上曰如何批荅遷對曰湏說得委曲東陽曰要見重事上曰然宗廟事重要見今後世子孫崇奉不缺之意此本隨文書來健等曰臣等領去上即以本授健復目送

而後
卷之二十二
三十三
而出二十二日復召上袖出奉先殿圖指示曰此與太廟寢規制一般常時祭薦皆在此又指其廊間有門通西一區曰此奉慈殿也舊為神庫今廊廡及井俱未動指東又其一區別為門面南五間東西廊各五間此神厨也欲如此建廟可乎健等對曰此最便東陽曰但未知寬窄如何上曰寬窄有數因指其傍曰東西十幾丈南北二十丈後有墻墻之後為米倉蓋較之奉慈殿深不及八尺皆請曰墻可展否上曰須展之其西偏有井

亭亦須去之耳又曰欲遷孝穆太后併祭於此如何健等皆對曰甚當再問再對上曰位序如何健等對曰太皇太后中一室孝穆太后或左或右一室上曰須在左後來有如此者却居右東陽曰太皇太后居中乃可外廷瞻仰此本已數日上曰正為廟地未定今既定即出矣皆拜出如前會禮部尚書吳寬亦言周祭姜嫄於別廟詩謂之閟宮魯桓公之母仲子不得祔廟春秋書考仲子之宮至宋始有兩后並祔之說然豈後世所法哉

上意合二十五日御批云祀享重事禮當詳慎卿等稽
考古典及祖宗廟制既已明白都准議特建廟等享仍
稱太皇太后以伸朕尊親之意後世子孫遵守宗奉永
為定制於是中外翕然稱為得禮

審樂

吳元年七月乙亥上御戟門召學士朱升領樂舞生入
見設雜樂令試之上親擊石磬命升辨五音升以宮音
為徵音上曰何乃以宮作徵耶起居注熊鼎對曰八音

之中石最難和故書曰於予擊石拊石百獸率舞上曰
石聲固難和然樂以人聲為主人聲和則八音和矣因
命樂生登歌一曲上復嘆曰古者作樂以和民聲格神
人而與天地同其和近世儒者鮮知音律之學欲樂和
顧不難耶鼎等對曰樂音不在外求實在人君一心君
心和則天地之氣亦和天地之氣和則樂亦無不和矣
上深然之其後命升等撰圜丘方丘樂章而朝享太廟
諸樂章則詔梁寅等分為之永樂元年九月成祖詔學

士王景等擬撰樂章竟未施行凡舞用習於郊壇武舞服左袖上書除暴安民四字弘治中用儒臣建議復之惟中和樂隸教坊率多俗部如解縉所論者嘉靖九年六月十五日臣道南奏為稽古樂以裨盛典事臣伏考洪武十七年六月庚午我太祖高皇帝諭曰治天下之道禮樂二者而已若通於禮而不通於樂非所以淑人心而出治道達於樂而弗達於禮非所以振紀綱而立大中臣嘗莊誦見聖祖獨稟全智超越千古允升大猷

參贊萬化故至治馨香達於神明休徵駢疊登諸史策
禮樂百年而後興亶其然矣恭惟皇上光紹聖祖之不
圖肇舉明王之盛典禮崇三典樂備四郊邇者宸翰飛
灑親撰圜丘方丘樂章昭煥乾文發揮道妙被之管絃
協乎律呂真有以動天地而感鬼神矣臣惟古帝王之
樂莫善於虞莫備於周書曰予欲聞六律五聲八音在
治忽以出納五言汝聽周家大司樂以六律六同五聲
八音六舞大合樂以致鬼神祇蓋聖人作則必以天地

為本歷所以經天時也律所以候地氣也天地相為經
緯律歷相為表裏天數五地數五五位相得而各有合
天五與地十合而生土其聲為宮地四與天九合而生
金其聲為商天三與地八合而生木其聲為角地二與
天七合而生火其聲為徵天一與地六合而生水其聲
為羽五聲相生旋相為宮於是播之以八音所以宣八
風之和聲也諧之以十二律所以順四時之和氣也有
元氣而後有和氣有元聲而後有和聲聲和則氣和氣

和則形和形和而天地之和自應矣臣請以古樂之可行於今與夫今樂之有戾於古者言之古者樂律之制陽律從乾陰呂從坤故奏黃鍾歌大呂以祀天神奏太簇歌應鍾以祭地祇奏姑洗歌南呂以祀四望奏蕤賓歌函鍾以祭山川奏夷則歌小呂以享先妣奏無射歌夾鍾以享先祖蓋人聲與樂聲相比而抑揚高下各有其節今之樂律則職掌於太常寺協律郎傳之既久而寢失其初意用之既殊而不得乎元聲其於陰陽配合

之理律呂子母之義未必盡然也古者樂舞之設文舞
羽籥武舞干戚故祀天神則舞雲門祭地祇則舞咸池
四望則舞大磬祭山川則舞大夏享先妣則舞大濩享
先祖則舞大武蓋樂舞與樂律相應而綴兆舒疾咸中
其度今之樂舞則隸習於太常寺樂舞生朱干玉戚祗
繪之於服皇帔旒皐弗辨之於佾其於樂師六舞之儀
舞師四舞之節恐未必盡然也古者大享之禮所以親
君臣也周禮王宮懸凡饗食奏燕樂歌工在上舞位在

下琴瑟在堂鐘鼓在庭各從其類無相奪倫今天祀慶
成設宴於奉天殿教坊司承應雅俗混淆優侏雜進恐
非所以祇承上天之餘惠也古者籍田之禮所以重農
事也周禮王出入則奏王夏司空除壇農正陳藉鬱人
薦鬯犧人薦醴各司其事無相越職今躬耕籍田設樂
於先農壇教坊司承應羣伶紛擾衆劇喧虺恐非所以
表率下民之先務也凡此數者雖載在令甲相沿有年
而關係匪輕釐正宜急宋儒周敦頤曰樂者古以平心

今以助欲古以宣化今以長怨不復古禮不變今樂而欲至治者遠矣皇上法古帝王行古典禮天地日月之祀既已復其初郊廟朝廷之樂未盡合乎古記曰作者之謂聖述者之謂明聖人在上作必自今始矣或以為元聲難知也古樂難復也臣歷考載籍樂家之說尚在也論樂之本則有若樂記載樂之文則有若儀禮自周以降雖失其傳然司馬遷撰律歷書班固宗之是故有三統之論蔡元定著律呂書朱熹稱之以為成一家之

言若陳腸之樂書則又備載古今之制而無遺者也然
欲求元聲當求諸經易曰雷出地奮豫先王以作樂崇
德夫雷也者運天地之元氣以鼓萬物之出機者也知
雷之元氣之所以發則知樂之元聲之所以宣矣舜命
夔曰詩言志歌詠言聲依永律和聲我聖祖謂熊鼎曰
樂以人聲為主入聲和則八音諧矣斯訓也即舜命夔
意也萬古不易之定論也記曰知聲而不知音者禽獸
是也知音而不知樂者衆庶是也臣非知樂者也姑述

所聞按古樂書條為之說一曰稽五聲以審八音二曰稽八音以審十二律三曰稽十二律以審旋宮若歷代諸家之議互有得失元儒許衡固自有定論矣臣不敢備述謹繹其義開具進呈一曰稽五聲以審八音禮曰五聲六律十二管旋相為宮也孟子亦曰不以六律不能正五音五音也者天地自然之聲也在天為五星之精在地為五行之氣在人為五臟之聲出於脾合口而通之謂之宮出於肺開口而吐之謂之商出於肝而張

口湧吻謂之角出於心而齒合吻開謂之徵出於腎而齒開吻聚謂之羽宮土行也君象也其性信其味甘其色黃其事思其位戊己其數八十有一其聲重以舒猶夫牛之鳴窳也而主合也商金行也臣象也其性義其味辛其色白其事言其位庚辛其數七十有二其聲明以敏猶夫羊之離羣也而主張也角木行也民象也其性仁其味酸其色青其事貌其位甲乙其數六十有四其聲防以約猶夫雉之登木也而主湧也徵火行也事

象也其性禮其味苦其色赤其事視其位丙丁其數五十有四其聲泛以疾猶夫豕之負駭也而主分也羽水行也物象也其性智其味醎其色黑其事聽其位壬癸其數四十有八其聲散以虛猶夫馬之鳴野也而主吐也宮數八十有一下生為徵徵數五十有四上生為商商數七十有二下生為羽羽數四十有八上生為角角數六十有四五色成文而不亂八風從律而不姦百度得數而有常史記曰宮動脾而和正聖商動肺而和正

義角動肝而和正仁徵動心而和正禮羽動腎而和正
智聞宮音使人溫舒而廣大聞商音使人方正而好義
聞角音使人惻隱而愛人聞徵音使人樂善而好施聞
羽音使人整齊而好禮聲音之道與政通矣臣按洪武
十七年六月甲午我聖祖諭禮部臣曰古之律呂協天
地自然之氣後世之律呂出人為智巧之私天時與地
氣不審人聲與樂聲不比故雖以古之詩章用古之器
數亦乖戾而不合陵犯而不倫矣手擊之而不得於心

口歌之而非出於志人與樂判然為二而欲動天地感鬼神豈不難哉臣惟十二律生於八音八音生於五聲漢制氏惟傳其鏗鏘歌舞而不得其義自李延年以新聲進而樂始雜矣宋之胡瑗李照范鎮阮逸議論雖多而無適於用均之亦未為得也伏願皇上昭宣祖訓勅下所司延訪通樂之儒遴選典樂之官務重其任而不泛視以為常務久其任而不更易以為數凡協律郎必擇其行誼端謹音律閑熟者不許虛應故事而卑汚冗

濫得以列其間凡樂舞生必擇其年貌精壯禮節閑熟者不許濫收庸品而瑣屑齷齪得以容其跡庶乎教之豫而有本習之久而後化而古樂可復矣二曰稽八音以審十二律易曰易有太極是生兩儀兩儀生四象四象生八卦是故惟乾也為天下之至陽而石音繫焉惟坤也為天下之至陰而土音繫焉竹音震革音坎匏音艮音雖不同而同於陽皆本乎乾者也木音巽絲音離金音兌音雖不同而同於陰皆本乎坤者也是故石乾

音也其風不周其聲溫栗其音辨立冬之氣也其為樂也為玉磬為馨磬為編磬為離磬為笙磬為頌磬為球為蹇革坎音也其風廣莫其聲隆大其音謹冬至之氣也其為樂也為鼓為拊為鞀為鞀為鞀為應為鼗為鞀為提為鼗為靈為建鼓為足鼓為楹鼓為懸鼓匏良音也其風融其聲崇聚其音愀立春之氣也其為樂也為鳳笙為篳篥為大竽為小竽為和竹震音也其風明庶其聲越其音溫春分之氣也其為樂也為簫為箏為管為篳

為筇為箛為篴為篥為箏木巽音也其風清明其聲茂
遂其音直立夏之氣也其為樂也為柷為敔為止為鏡
為控楫為春牘絲離音也其風景其聲纖微其音哀夏
至之氣也其為樂也為琴為瑟為離琴為中琴為小琴
為灑瑟為中瑟為小瑟土坤音也其風涼其聲含宏其
音濁立秋之氣也其為樂也為土鼓為瓦鼓為埙為缶
為雅填金兌音也其風閭闔其聲春容其音鏗秋分之
氣也其為樂也為鐘為鏞為編鐘為鎛鐘為剽為棧為

罇為鐻為鉦為鐸樂記曰鐘聲鏗鏗以立號號以立橫
橫以立武君子聽鐘聲則思武臣石聲磬磬以立辨辨
以致死君子聽磬聲則思死封疆之臣絲聲哀哀以立
廉廉以立志君子聽琴瑟之聲則思志義之臣竹聲濫
濫以立會會以聚衆君子聽竽笙簫管之聲則思畜聚
之臣鼓鼙之聲謹謹以立動動以進衆君子聽鼓鼙之
聲則思將帥之臣是故觀其所感而天下之情見矣臣
按國初吳元年七月乙亥上諭起居注熊鼎曰古者作

樂以和民聲格神人而與天地同其和近世儒者鮮知
音律之學顧不難耶鼎對曰樂音不在外求實在人君
一心君心和則天地之氣亦和天地之氣和則樂亦無
不和矣臣惟古樂惟虞韶為善知樂者惟后夔為善若
孔子在齊聞韶季札在魯觀韶猶能興起於百世之下
而况當時之羣后乎嗣是若周之伶州鳩晉之師曠魯
之師襄皆能詠歌諷誦以有得於心演繹敷暢以不謬
其學君子取焉下至漢之鄭玄蔡邕晉之荀勗唐之祖

孝孫周之王朴宋之劉几楊傑諸人雖號為知樂要未能如古人之精也伏願皇上昭宣祖訓勅下所司精製八音之器務擇其所產之地如嶧陽之桐泗濱之石則氣完而不爽調和衆樂之成務辨其旋宮之節如璧之斯合如珠之斯聯則樂大而有意以十有二律為之節度而上則乎乾象之文十有二聲為之齊量而下宣乎月令之氣庶乎有合於古而不失其正無戾於今而可垂於久矣三曰稽十二律以審旋宮易曰神也者妙萬

物而為言者也動萬物者莫疾乎雷撓萬物者莫疾乎
風燥萬物者莫熯乎火說萬物者莫說乎澤潤萬物者
莫潤乎水終萬物始萬物者莫盛乎艮是故萬物孽萌
於子紐牙於丑冒茹於卯振美於辰巳盛於巳罟布於
午昧夢於未申堅於申留熟於酉畢入於戌闔該於亥
陽氣鍾於子也謂之黃鐘其歲困敦其宿虛其次頽女
其辰星紀其候冬至其卦為乾之初九陰氣旋於丑也
謂之大呂其歲赤奮若其宿牽牛其次建星其辰元枵

其候大寒其卦為坤之六四萬物湊地而出也謂之太
族其歲攝提格其宿箕其次尾其辰娠訾其候啓蟄其
卦為乾之九二陰陽相夾而聚也謂之夾鐘其歲單闕
其宿心其次房其辰降婁其候春分其卦為坤之六五
萬物潔而齊發也謂之姑洗其歲執徐其宿氐其次亢
其辰大梁其候清明其卦為乾之九三萬物旅而西行
也謂之仲呂其歲大荒落其宿軫其次翼其辰實沈其
候小滿其卦為坤之上六陰氣繼陽而賓也謂之蕤賓

其歲敦牂其宿張其次七星其辰鶉首其候夏至其卦
為乾之九四萬物成熟而衆也謂之林鐘其歲協洽其
宿弧其次狼其辰鶉火其候大暑其卦為坤之初六萬
物夷易而儀則也謂之夷則其歲涇灘其宿伐其次參
其辰鶉尾其候處暑其卦為乾之九五陽氣旋入於南
也謂之南呂其歲作噩其宿畢其次昴其辰壽星其候
秋分其卦為坤之六二陽氣無餘而畢也謂之無射其
歲闋茂其宿胃其次奎其辰大火其候霜降其卦為乾

之上九陰陽交應而初閉也謂之應鐘其歲大淵獻其宿壁其次室危其辰析木其候小雪其卦為坤之六三是故黃鐘之實九寸而下生林鐘焉林鐘之實六寸而上生太簇焉太簇之實八寸而下生南呂焉南呂之實五寸三分有奇而上生姑洗焉姑洗之實七寸一分有奇而下生應鐘焉應鐘之實四寸六分有奇而上生蕤賓焉蕤賓之實六寸二分有奇而又上生大呂焉大呂之實八寸三分有奇而下生夷則焉夷則之實五寸五

分有奇而上生夾鐘焉夾鐘之實七寸四分有奇而下
生無射焉無射之實四寸八分有奇而上生仲呂焉仲
呂六寸五分有奇而復生黃鐘而變化無窮矣樂記曰
清明象天廣大象地終始象四時周旋象風雨此聖人
作樂之本也臣按洪武四年六月戊申我聖祖諭禮部
尚書陶凱等曰禮以尊敬樂以宣和不敬不和何以為
治元時古樂俱廢惟淫詞艷曲更唱迭和又使北鄙之
聲與正音相雜甚者以古帝王祀典神祇飾為武隊諧

戲殿廷非所以導中和崇治體也今一切流俗諛諛淫
褻之樂悉屏去之臣惟古樂不復于今久矣自元入中
國古樂益廢我聖祖掃除洗濯會朝清明悉崇古雅觀
諸大明集禮所載昭如日星人所共見柰何浸淫日久
新聲代變俗樂雜乎雅羌樂雜乎俗而怙懣噍殺之音
沈溺怪幻之伎作矣孔子曰樂則韶舞放鄭聲又曰惡
鄭聲恐其亂樂也他日夾谷之會又斥萊夷之舞之熒
惑漢臣陳禪亦曰帝王之廷不宜作邊疆之樂是古樂

之日就散亡者如此固未可委於誅師而屬之寄象鞅
譯也伏願皇上昭宣祖訓勅下所司歷考雅樂之章革
去邊樂之部凡淫哇之聲有亂乎正音者斥之不使復
用凡妖冶之技有出於奇袤者禁之不使復習庶乎風
行自近而大道為公俗正於遠而頌聲可作矣疏上上
批曰禮部看了來說禮部尚書李時左侍郎嚴嵩右侍
郎湛若水等議云中允道南所議音樂無非欲復古正
今以成一代盛典然音樂之妙自古難精儒者之議主

於義理故考據該博而諧協則難工藝之術泥於傳習故聲音近似而義理實悖今太常所傳音律不惟不合於古制而於國初制作之意亦罕有存者但欲更改恐難遞行合候選有精通音律之人將前項所議條件令其逐一酌量議處至於朱干玉戚祇繪於服皇帳旒臯弗辨於佾委非古人樂舞之義臣等竊以此等儀文非若音律之難改者而祖宗以來遵用不變或有深意寓於其間非臣等所能測識其稱慶成藉田樂章樂舞雅俗混

禱蓋慶成有平定天下撫定四夷車書會同表正萬邦
天命有德而又有黃童白叟及蠻夷隊舞二項承應耕
田有村田樂及感天地隊舞俱係承應夫既謂之承應
則為俗樂明矣但祭祀專用雅樂朝會兼用俗樂自唐
宋以來皆然惟慶成有仰天恩感地德之曲今慶園丘
禮成而仍用感地德似為無謂况各項樂章詞多俚俗
率係樂工猥陋之語誠不宜用之朝廷傳之後世今欲
因祖宗之制而少加潤色宣功德之美而擬諸形容默

寓箴規警戒不至於褻狎雜擾其於治體不為無補七月十五日奉聖旨考定音律待真知者行羽籥于戚不宜繪於服當如禮制更定其朝燕等樂且姑照舊今年至日大祀後宴樂章曲名還着翰林院官撰用臣道南奉命撰上慶成樂章九奏凡四十九章欽遵宸諭改感地德為感昊德兩宮燕樂暨西苑無逸殿函風亭燕講官樂章俱道南撰進上親裁定

殿閣詞林記卷二十二